

粵雅堂叢書

飲

水

集

# 序

國朝詩別裁集載容若遼陽人康熙癸丑進士丙辰  
殿試官侍衛著有通志堂集其詩登五首而全集罕見  
是集飲水詩詞錫山顧貞觀閱定古燕張純修序而行  
之蓋兩公與容若交最深故思所以不朽容若者考別  
裁所登擬盧子諒時興山海關柳枝詞俱是集所未錄  
則知是集亦選存之本余在桂林側聞大中丞稚圭先  
生緒論及詞學推容若爲南唐後主真派令曲勝於漫  
序出是集云得之京師廠肆惜其後闕頁余亟請刊布

以廣其傳先生領之竊思容若爲大學士明公之子天  
姿慧悟清澈靈府年少通籍不永其年所作善言情又  
好言愁其纏綿悱惻之概時動簡外謂非得風人之旨  
而爲騷雅之遺哉

道光乙巳夏五月旣望華亭張祥河

飲水詩詞集序

余旣哀容若詩詞付之梓人刻旣成謹泚筆而爲之序  
曰嗟乎謂造物者而有意於容若也不應奪之如此其  
速謂造物者而無意於容若也不應畀之如此其厚豈  
一人之身故有可解不可解者耶容若與余爲異姓昆  
弟其生平有死生之友曰顧梁汾梁汾嘗言人生百年  
一彈指頃富貴草頭露耳容若當思所以不朽吾亦甚  
思所以不朽容若者夫立德非旦暮間事立功又未可  
預必無已試立言乎而言之僅僅以詩詞見者非容若

意也并非梁汾意也語云非窮愁不能著書古之人欲成一家之言網羅編葺動需歲月今容若之才得於天者非不最優而有章服以束其體有職守以勞其生復不少假之年俾得殫其力以從事於儒生之所爲噫嘻豈真以畀之者奪之而其所不可解者卽其所可解者耶梁汾從京師南來每與余酒闌燈炮追數往事輒相顧太息或泣下不可止憶容若素矜慎不輕爲文章極留意經學而所爲經解諸序從未出以相示此卷得之梁汾手授其詩之超逸詞之雋婉世共知之而其所以

爲詩詞者依然容若自言如魚飲水冷煖自知而已區  
區痛惜之私欲不言不忍姑述其大略如是云時康熙  
辛未秋仲古燕張純修書於廣陵署之語石軒

飲水詩集

長白性德著

擬古

煌煌古京洛昭代盛文治曰余餐霞人簪紱忽如寄微  
尚竟莫宣修名期自致榮華及三春常恐秋節至學仙  
既蹉跎風雅亦吾事

相彼東田麥春風吹嫋嫋過時若不治瓜蔓同枯槁天  
道本杳冥人謀苦不早荒廬日盱坐百慮依春草四顧  
何茫然凝思失昏曉

乘險歎王陽叱馭來王尊委身置歧路忠孝難并論有  
客齎黃金誤投關西門凜然四知言清白貽子孫

客從東方來叩之非常流白云發扶桑期到海西頭白  
日當中天浩蕩三山秋迴風忽不見去逐靈光遊燭龍  
莫掩照使我心中愁

天門詖蕩蕩翕赭羅星纏白日矚微躬假翼令飛騫平  
生紫霞心翻然向凌烟雙吹鳳笙歇宛轉辭羣仙越影  
箭浮雲橫出天駟前玉繩耿中夜帝車何時旋

曠然成獨立片月相古今睠茲西北樓斜暉鳴玉琴清

影忽以去悵惘予何心

竹生本孤高倏然自植立矯矯雲中鶴翱翔何所集丈  
夫故豁達身世何汲汲外物信非意潦倒翻成泣瞻彼  
嶺頭雲扶疏被原隰延佇當重陰西風吹衣急

寒沙連雲起遙空白雁落之子方從軍深閨竟寂寞天  
遠豈知返路阻長河絡北風吹瘦馬鐵衣不堪著從軍  
日未久朱顏鏡中削悠悠復悠悠人生胡不樂

妾如三春花君如二月風澹澹從東來吹作天桃紅一  
朝從軍行令人歎飛蓬何似雲間月清輝千里同

天地忽如寄人生多苦辛何如但飲酒邈然懷古人南  
山有閒田不治委荆榛今年適種豆枝葉何莘莘豆實  
既可採豆蘗亦可薪

宇宙何蕩蕩皇天亦安知屈平放江潭子胥乃鴟夷升  
沈本偶然遇合甯有知千古恨如此徒爲弔者悲微生  
亦何幸勗哉邁時期

三月燕已來清陰杏子落春風在青草吹我度城郭道  
逢貴公子銀鞍紫絲絡藉草展華茵相邀共盃酌爲言  
相見歡殷勤費酬酢久之語漸洽禮數少脫略初誇身

手好漫敘及勲爵惜哉君卿才何事失宦學予笑但飲  
酒日暮風沙惡走馬東西別歸路烟漠漠

余生未三十憂愁居其半心事如落花春風吹已斷行  
當適遠道作計殊汗漫寒食青草多薄暮烟冥冥山桃  
一夜雨茵箔隨飄零願餐紅玉草一醉不復醒

松生知何年積鐵立一碧其上無女蘿其下遠荆棘何  
用託孤根蒼崖多白石亦有青蘭花吐芬在其側

美人臨殘月無言若有思含顰但斜睇吁嗟憐者誰予  
本多情人寸心聊自持浩歌幽蘭曲援琴終不怡私恨

託遠夢初日照簾帷

安石負盛名乃在衡門初名僧既接席妙伎亦同車仕  
進良偶然年已四十餘軍國事方棘圍碁看捷書所以  
絲竹歡陶寫待桑榆晚造泛海裝始志終不渝馬策西  
州門想像生存居君看早達者懷抱竟何如

涼風颯然至秋雨滿空階室有積憂人所思在天涯蟋  
蟀鳴北牖蛛絲落高槐明發出門望爽氣正西來西山  
有澗阿肥遯以爲懷

生本蒲柳姿回飈任西東心如秋潭水夕陽照已空落

花委波文天地如飄蓬忽佩紫金魚予心何夢夢不如  
葺茅屋種竹栽梧桐貴賤本自我榮辱隨飛鴻何哉阮  
步兵慷慨泣途窮

客遺緗綺琴言是雷霄斷能啼空山猿亦飛秋澗瀑  
之發古調三奏不成曲朱絃淡無味余亦那免俗

白雲本無心卷舒南山巔遙峰如夢中孤影相與還忽  
然間高霞霏霏欲成煙風花落不已流輝轉可憐皎潔  
自多愁况復對下弦高樓夜已半惜此不成眠

歲星不在天大隱金馬門微言亦高論一一感至尊文

園苦愁病凌雲氣蕭瑟乘傳威始伸諫獵情彌切所爲  
一卷書乃待身後出

西漢有賈生卓犖真奇士齋志終未達盛年身竟死爲  
文弔屈平可憐湘江水忤俗謝勲貴輕生答知己臨風  
忽搔首吾亦從逝矣

鳳翔幾千仞羽儀在寥廓結巢梧桐頂層雲覆阿閣非  
無青琅玕不寄西飛鶴一鶴正西飛翩翩長苦饑玉潭  
照清影獨自刷毛衣生得謝虞羅光彩非所希

初日淡楊柳對之何所言東風幾千里吹入十二門天

地忽如寤青草招迷魂堂堂復堂堂春去將誰論  
世運倏代謝風節棄已久馨折投朱門高談盡畎畝言  
行清濁間術工乃逾醜人生若草露營營苦奔走爲問  
身後名何如一杯酒行當向酒泉竹林呼某某時有西  
風來吹香滿鬢缶不問今何時臨風但搔首

宛馬精權奇歛從西極來蹴踏不動塵但見煙雲開天  
閑十萬匹對此皆凡材傾都看龍種選日登燕臺却瞻  
橫門道心與浮雲灰但受伏櫪恩何以異駑駘

春風解河冰戚里多歡娛置酒坐相招鼓瑟復吹竽而

我出郭門望遠心煩紆垂鞭信所歷舊壘啼饑鳥吁嗟  
獻納者誰上流民圖一騎紅塵來傳有雙羽書慷慨欲  
請纓沈吟且踟躕終爲孤鳴鶴奮翥凌雲衢

落日忽西下長風自東來天地果何意逝水去不回世  
事看奕棊劫盡昆明灰長安羅冠蓋浮名良可哀不如  
巢居子遁跡從蒿萊

行行重行行分手向河梁持杯欲勸君離思激中腸努  
力飲此酒無爲居者傷

長安游俠子黃金視如土結交及屠博安知重圭組一

朝列華筵羞與朱履伍惜哉意氣盡委身逐傾吐時俗  
尙唯阿至人亦偃僕惟昔有贈言深藏乃良賈

閉關謝西域漢文何優柔聖澤逾亥步遐荒如甸侯旅  
獒旣充貢越雉亦見收蠻族進珊瑚不煩使者求昭回  
雲漢章燭及海外州人生觀盛事豈羨乘槎遊

聖主重文學清時無隱淪遂令拂衣者還爲棄繻人適  
意聊復爾去來若無因昔采西山薇今憶淞江蕪

結廬依深谷花落長閉關日出眾鳥去良久孤雲還迴  
風送疏雨微芬扇幽蘭白日但靜坐坐對門前山生世

多辛苦何如日閒閒

與君昔相逢乃在苧蘿村相逢卽相別後期安可論揚  
蛾啟玉齒聲發已復吞詎絕賞音者其如一顧恩

信陵敬愛客舉世稱其賢執轡過市中爲壽監門前邯  
鄲解圍日羈矢引道邊救趙適自危故國從棄捐功成  
失去就始覺心茫然再勝却秦軍遭讒竟誰憐趣歸不  
善後作計非萬全博徒賣漿者名字亦不傳惜哉所從  
遊中詎無神仙飲酒雖達生辟穀乃長年

積雪在房櫳新月光欲凝照地若無迹娟娟破月暝明

燈遲我友攬裘坐開徑人生何茫茫卽事偶成興南飛  
有烏鵲遶樹棲不定持杯欲問之東風吹酒醒

魏闕有浮雲蔭茲白日暮返景下銅臺歌聲發紈素流  
輝如有情千載照長路漳河不西還百川盡東赴時哉  
不可失讜言思所悟雨後望西陵蔓草縈古墓安得爲  
飄風永吹連理樹

彩虹亘東方照耀不知晚川長組練明關塞若在眼我  
友肯從征三歲胡不返邊馬鳴蕭蕭落日照沙苑封侯  
固有時寄語加餐飯

吾憐趙松雪身是帝王裔神采照殿庭至尊歎昳麗少年疏遠臣侃侃持正議才高興轉逸敏妙擅一切旁通佛老言窮探音律細鑒古定誰作真偽不容諦亦有同心人閨中金蘭契書畫掩文章文章掩經濟得此良已足風流渺難繼

朔風吹古柳時序忽代續庭草萎已盡顧視白日速吾本落拓人無爲自拘束侷儻寄天地樊籠非所欲嗟哉華亭鶴榮名反以辱有客歎二毛操觚序金谷酒空人盡去聚散何局促攬衣起長歌明月皎如玉

聖駕臨江恭賦

黃幄臨大江山川借顏色鯨鯢久已盡不待天弧射按  
圖識要汎懷古討遺跡帆檣擒虎渡營壘佛狸壁時清  
非恃險何事限南北却上妙高臺悠悠天水碧

虎阜

孤聳一片石却疑誰家園烟林晚逾密草花冬尙繁人  
因警蹕靜地從歌吹喧一泓劒池水可以清心魂金虎  
旣銷滅玉燕亦飛翻美人與死士中夜相爲言

江行

木落江已空  
清輝澹鷗鷺  
不見繫纜石  
寒潮沒瓜步  
帆移青楓林  
人歸白沙渡  
似有山猿啼  
窈然瀟湘暮

平原過漢樊侯墓

雲龍會影響  
駕馭從豁達  
樊侯鼓刀人  
時來遂揮喝  
一望重瞳營  
再排隆準闢  
良平信美好  
對此氣應奪  
斯人在層泉  
猶勝懦夫活

桑榆墅同梁汾夜望

朝市競初日  
幽棲閒夕陽  
登樓一縱目  
遠近青茫茫  
眾鳥歸已盡  
烟中下牛羊  
不知何年寺  
鐘梵相低昂  
無月

見村火有時聞天香一花露中墜始覺單衣裳置酒當前  
簷酒若清露涼百憂茲暫豁與子各盡觴絲竹在東  
山懷哉詎能忘

爲王阮亭題戴務旃畫

心與西山清坐對西山雪山空多幽響芳草久云歇白  
雲如滄洲縹緲不可越丹青意何長宛此山徑折卧遊  
失所見空林一片月

暮春別巖四菴友

高雲媚春日坐覺魚鳥親可憐暮春候病中別故人鶯

啼花亂落風吹成錦茵君去一何速到家垂柳新芙蓉  
湖上月照君垂長綸

送施尊師歸穹窿

突兀穹窿山丸丸多松柏造化鍾靈秀真人爰此宅真  
人號鐵竹鶴髮長生客天風吹雨輪長安駐雲鳥偶然  
懷故山獨鶴去無跡地偏宜古服世遠忘朝夕空壇松  
子落小洞野花積蒼崖採紫芝丹竈煮白石簷前一片  
雲卷舒何自適他日再相見我鬢應垂白願此受丹經  
冥心鍊金液

寄朱錫鬯

萍梗忽南北相聚復相離去年一相見正值落花時秋  
風苦催歸轉眼歲已期淅淅秋葉落綿綿秋夜遲開戶  
見殘月道遠有所思丈夫故慷慨此別何淒其明發攬  
塵鏡新寒生鬢絲

早春雪後同姜西溟作

西山雪易積北風吹更多欲尋高士去層冰鬱嵯峨琉  
璃一萬片映徹桑乾河耳目故以清苦寒其如何朝鴉  
背城來晴旭滿岩阿春泥凍尙合九衢交鳴珂忽覩新

歲華履端布陽和不知題柱客誰和郢中歌

送梁汾

西窗涼雨過一燈乍明滅沈憂從中來綿綿不可絕如  
何此際心更當與君別南北三千里同心不得說秋風  
吹蓼花清淚忽成血

題李空同詩卷和王黃湄韻

李侯卓犖人骨體本不媚貂璫燄屢觸全生偶然遂昌  
言勗友朋贈答不無謂想其詩成時良亦自矜貴果得  
身後名譏讒復何畏

峻龍與經巖叔夜話

絕域當長宵欲言冰在齒生不赴邊庭苦寒甯識此草  
白霜氣空沙黃月色死哀鴻失其羣凍翮飛不起誰持  
花間集一鐙氊帳裏

宿龍泉山寺

招提偶然到再宿離喧雜列岫霽始開雙扉晚初闔禪  
心投鉢龍梵響下簷鴿旣閒陵闕望亦謝王賓答遙夜  
一鐙深石鑪燒艾蒨

輓劉富川

次卜寺長

十一  
粵雅堂叢書

人生非金石胡爲年歲憂有如我早死誰復爲沈浮我  
生二十年四海息戈矛逆孽忽萌生斬木起炎州窮荒  
苦焚掠野哭聲啾啾墟落斷炊煙津梁絕行舟片紙入  
西粵連營倏相投長吏或奔竄城郭等廢邱背恩甯有  
義降賊竟無羞予聞空太息嗟彼巾幗儔黯澹金臺望  
蒼茫桂林愁卓哉劉先生浩氣凌斗牛投軀赴清川噴  
薄萬古流誰過汨羅水作賦從君遊白雲如君心蒼梧  
遠悠悠

野鶴吟贈友

鶴生本自野終歲不見人朝飲碧溪水暮宿滄江濱忽  
然被繒繳矯首盼青雲僕亦本狂士富貴鴻毛輕沖舉  
道無由幡然逐華纓動止類循牆戢身避高名憐君是  
知己習俗苦不更安得從君去心同流水清

填詞

詩亡詞乃盛比興此焉託往往歡娛工不如憂患作冬  
郎一生極憔悴判與三閭共醒醉美人香草可憐春鳳  
蠟紅巾無限淚芒屨心事杜陵知祇今惟賞杜陵詩古  
人且失風人旨何怪俗眼輕填詞詞源遠過詩律近擬

古樂府特加潤不見句讀參差三百篇已自換頭兼轉  
韻

送馬雲翎歸江南

側身宇宙間長嘯久獨立之子我友人南歸事蓑笠交  
情如谷風澹澹復習習吹君度江去片帆春雨溼棄捐  
世所悲予獨爲君喜君歸葺屋南山裏燕麥青青纔覆  
雉新鶯啼過眠未起笑看我輩紅塵死

趙松雪畫鵲華秋色卷

歷下亭邊兩拳石不似江南好山色乍看落日照來黃

渾疑劫火燒將黑更無楓橘點清秋惟見蕭蕭白楊白  
君爲此山合山好空翠俄從楮間滴知君著意在明湖  
掩映山光若有無曲折似還通灤口蒼茫定不屬城隅  
鯉魚風高網罟集彷彿漁唱來菰蒲一竿我欲隨風去  
不信扁舟是畫圖

新晴

新晴暖風吹柔荑綠煙如翦稻苗齊夕陽一片照長隄  
隔雲殘雨猶淒淒柳外如聞驄馬嘶柳絲帶雨拂深閨  
誰家少婦最高梯凝情空怨錦江西

又贈馬雲翎

岿堯最高山山氣蒸爲雲物本相感生相感乃相親吁  
嗟人生不可擬君南我北三千里一朝傾蓋便相歡兩  
人心事如江水君身似是秋風客身輕欲奮凌霄翮語  
君無限傷心事終古長江江月白世事紛紛等飛絮我  
今潦倒隨所寓惟願飲酒讀君詩花前醉卧夢君去

長安行贈葉訥菴庶子

長安舊是帝王宅萬戶千門麗金碧歌鐘甲第盡王侯  
繡幃雕鞍照長陌紛紛入眼競繁華春日春光好誰惜

春風初吹上林草一夜雪深山盡老雪花飛來大如席  
化作新泥徧周道角聲嗚嗚破早煙驚鴉飛去未明天  
青樓綺閣不卷簾玉河凍合層冰堅只疑此際行人絕  
甯知槐柳森成列經過借問此爲誰云是東南貴遊客  
嗟哉人生何不齊清者如雲濁者泥忽憶崑山葉夫子  
磊磊落落隨所棲羨君著書窮歲月羨君意氣凌雲霓  
世無伯樂誰相識驂騑日暮空長嘶我亦憂時人志欲  
吞鯨鯢請君勿復言此道棄如遺聞道西山有瑤草何  
不同君一采之

送蓀友

人生何如不相識君老江南我燕北何如相逢不相見  
更無別恨橫胸臆留君不住我心苦橫門驪歌淚如雨  
君行四月草萋萋柳花桃花半委泥江流浩淼江月墮  
此時君亦應思我我今落拓何所止一事無成已如此  
平生縱有英雄血無由一濺荆江水荆江日落陣雲低  
橫戈躍馬今何時忽憶去年風雨夜與君展卷論王霸  
君今偃仰九龍間吾欲從茲事耕稼芙蓉湖上芙蓉花  
秋風未落如朝霞君如載酒須盡醉醉來不復思天涯

柳條邊

邊牆也以柳爲之在塞外

是處垣籬防絕塞角端西來畫疆界漢使今行虎落中  
秦城合築龍荒外龍荒虎落雨依然護得當時飲馬泉  
若使春風知別苦不應吹到柳條邊

扈從 聖駕祀東岳禮成恭紀

岱宗柴望處仙蹕迴雲霄大禮猶三代諸侯第一朝東  
封金牒字南指玉衡杓闕里應相近回鑾亦不遙

時傳旨

南巡同日祀曲阜聖廟

塞外示同行者

西風千萬騎颯背向陰山爲問傳書雁孤飛幾日還負  
霜憐戍卒乘月望鄉關王事兼程促休嗟客鬢斑

金陵

勝絕江南望依然圖畫中六朝幾興廢滅沒但歸鴻王  
氣倏云盡霸圖誰復雄尙疑鍾隱在回首月明空

寄梁汾并葺茅屋以招之

三年此離別作客滯何方隨意一尊酒殷勤看夕陽世  
誰容皎潔天特任疏狂聚首羨麋鹿爲君構草堂

題蘇文忠黃州寒食詩卷

古今誠落落何意得斯人紫禁稱才子黃州見逐臣風  
流如可接翰墨不無神展卷逢寒食標題想後塵

郊園卽事

勝侶招頻嬾幽尋度石梁地應隣射圃花不礙毬場解  
帶晴絲弱披襟露葉涼此閒蕭散絕隨意倒壺觴

沈進士爾燦歸吳興詩以送之

成名方得意幾日問歸舟獨有離居者蕭然感素秋一  
筇黃葉寺孤棹白蘋洲無限江湖興因君寄虎頭

時梁汾客

茗上

歲晚感舊

時序忽云暮離居倍悄然誰將仙掌露換却日高眠短  
夢分今古長愁減歲年平生無限淚一灑燭花前

送張見陽令江華

楚國連烽火深知作吏難吾憐張仲蔚臨別勸加餐避  
俗詩能寄趨時術恐殫好名無不可聊復砥狂瀾

戒壇同見陽作

欹斜一逕入門向夕陽邊何必堪娛賞凋零自可憐松  
寒疑有雪僧老不知年只合千峯上長吟看月圓

詠籠鶯

何處金衣客棲棲翠幙中有心驚曉夢無計識春風漫  
逐梁間燕誰巢井上桐空將雲路翼緘恨在雕籠

夜合花同梁藥亭顧梁汾吳天章姜西溟作

階前雙夜合枝葉敷華榮疏密共晴雨卷舒因晦明影  
隨筠箔亂香雜水沈生對此能消忿旋移近小楹

時乙丑五

月下  
弦

扈 駕馬蘭峪賜觀溫泉恭紀十韻

御天來鳳輦浴日啟龍池野迴紆 皇覽春濃值 聖

時落花縈綵仗初柳拂朱旗行漏三春擁停鑾萬象隨  
瑞徵泉是醴喜溢沼生芝特許觀靈液相將陟禁墀氣  
凝漿五色味結露三危仙蹕程遙度慈闈駕近移倍隆  
長樂養兼採廣微詩扈從誠多幸重華賞薦辭

擬冬日景忠山應制

岿堯鐵鳳鎖琳宮親侍鑾輿度碧空 聖主豈因崇象  
教宸游直自接鴻濛遠山雪有一峰白別浦楓餘幾片  
紅天意不教常肅殺佇看宇宙徧春風

湯泉應制

清時禮樂萃朝端次第郊原引玉鑾河岳千年歸帶礪  
寢園三月拜衣冠便從畿甸親民隱更啟神泉示從官  
非獨炎陵鍾坎德恩波深處不知寒

六龍初駐浴蘭天碧瓦朱旗共一川潤逼仙桃紅自舞  
醉酣人柳綠猶眠吹成暖律回燕谷散作薰風入舜絃  
最是垂衣深 聖德不須詞筆頌甘泉

魚鱗雁齒鏡中開濺沫爲霖遍九垓不用劫灰求彷彿  
便從天漢象昭回桑壇法駕乘春轉鶴禁仙鑣問寢來  
遙祝海隅同 帝澤年年長聽屬車雷

身向咸池傍末光三危露暖不成霜金鋪照日初涵影  
玉發生煙別作香地接蓬萊通御氣波翻豆蔻散朝涼  
微臣幸屬賡歌日願借如川獻壽觴

秋日送徐健菴夫子歸江南四首

江楓千里送浮颺玉佩朝天此暫辭黃菊承杯頻自覆  
青林繫馬試教騎朝端事業留他日天下文章重往時  
聞道 至尊還側席柏梁高宴待題詩

玉殿西頭落暗颺迴波甯作望恩辭蛾眉自是從相妬  
駿骨由來豈任騎白首盡爲酬遇日青山真奈送歸時

嚴裝欲發頻相顧四始重拈教詠詩

不同紈扇怨涼颼咫尺重華好薦辭衡嶽鴈排迴日字  
葛陂龍待化來騎斑斕正好稱觴暇絲竹誰從著屐時  
弱植敢忘春雨潤一生長誦角弓詩

惆悵離筵拂面颼幾人鸞禁有宏辭魚因尺素殷勤剖  
馬爲障泥鄭重騎定省暫應紆遠望行藏端不負清時  
春風好待鳴騶入不用淒涼錄別詩

卽日又賦

商飈獵獵帝城西極目平沙草色齊一夜霜清林葉下

五原秋迴塞鴻低相將綠酒浮萸菊莫向黃雲聽鼓鼙  
此日登高兼送遠欲歸還聽玉驄嘶

再送施尊師歸穹窿

紫府追隨結願深日歸行色乍駸駸秋風落葉吹飛鳥  
夜月橫江照鼓琴歷劫飛沈甯有意孤雲去住亦何心  
貞元朝士誰相待桃觀重來試一尋

題竹鑪新詠卷

并序

惠山聽松庵竹茶鑪歲久損壞甲子秋梁汾倣舊  
製復爲之置積書巖中諸名士作詩以紀其事是

冬余適得一卷題曰竹鑪新詠則明時王舍人孟  
端李相國西涯所爲竹鑪詩畫並在實聽松故物  
也喜以歸梁汾卽名其巖居曰新詠堂因次原韻  
鑪成卷得事天然乞與幽居置坐邊掩映芙蓉亭下月  
依稀斑竹嶺頭煙畫如董巨真高士詩在成宏極盛年  
相約過君同展看淡交終始似山泉

秋意

片雲銜日去疏雨欲來時忽見小庭中草花三兩枝  
涼風昨夜至枕簟已瑟瑟小女笑吹鐙牀頭捉蟋蟀

雨聲池館秋漠漠橫塘水水鳥故窺人飛入荷花裏

題趙松雪水村圖

北苑古神品斯圖得其秀爲問鷗波亭煙水無恙否

題胡瓌射鴈圖

人馬一時靜祇聽哀鴈音塞垣無事日聊欲耗雄心

西苑雜詠和蓀友韻二十首

宮花半落雨初停早是新炎撤畫屏何必醴泉堪避暑  
藕絲風好水西亭

離宮近繞綠蘋洲冰簟銀牀到處幽好是萬幾清暇日

親持玉勒奉宸遊

太液東頭散直遲一雙水鳥掠楊枝從臣獻罷平瀆賦  
坐聽中涓報午時

進來瓜果每承恩豹尾前頭拜至尊正是日斜花雨  
散傳呼聲在望春門

幔展輕羅一色裁瓊牕深映拂雲槐重簾那得微風入  
葉葉荷聲急雨來

黃幄臨池白鳥飛金盤初進鱸魚肥太平時節多歡賞  
花萼諸王半醉歸

射生纔罷晚開筵十部笙笳動暝煙月上南湖波似練  
幾星燈火是龍船

青絲蜀錦護銀塘誰許延秋報早涼縹緲蓬山應似此  
不知何處白雲鄉

纔翻急雨暗金河曲罷催呈雜技多一自花竿身手絕  
那將妙舞說陽阿

玉女窗扉靜不開藕花深處絕塵埃三更露坐清無暑  
共待蕉園彩鷁回

香引輕颺散玉除下簾聲徹退朝初馬曹此日承恩數

也逐清班許釣魚

煙柳千行宿鳥多  
虹梁曲曲水螢過  
新涼却愛中元節  
萬點荷鐙散玉河

夜深簾幙捲銀泥  
十二樓高望欲迷  
宮漏滴殘聞動鎖  
一鉤斜月碧河西

輕雲欲傍最高樓  
重露看垂白玉旒  
處處紅芳零落盡  
眾香國裏不曾秋

時攀御柳拂華簪  
水檻行開玉一函  
幾日烏龍江上去  
回看北斗是天南

玲瓏朱閣擬三山上駟門依御柳閒倦聽月中歌吹杳  
晨鳧秣罷夜分還

制勝由來仗德威夜郎何物敢輕違河清欲頌慚才盡  
空羨儒臣賜宴歸

講帷遲日記花顛下直歸來一惘然有夢不離香案側  
侍臣那得日高眠

不須惆悵憶江湖身入金門待漏圖中使擎來仙掌露  
尊羹風味得如無

花映初陽覆綺寮玉柯雙引望中遙憑君莫作煙波夢

曾是煙波夢早朝

敬題元公張大中丞遺照二首

豸冠丰采著垂魚共擬威稜肅翦除今日拜瞻溫克甚  
懸知宿好但詩書

憶從駒齒獎空羣執戟誰知似子雲鐘鼎旂常公不朽  
好憑班范紀餘芬

上元卽事

翠眊銀鞍南陌回鳳城簫鼓殷如雷分明太乙峰頭過  
一片金蓮火裏開

詠柳偕梁汾賦

煙水頻年瘦不支  
一生餘得許多絲  
靈和舊事今如夢  
却到人間綰別離

弱絮飛鶯一半休  
萬條千縷不勝愁  
祇應天上張星伴  
莫向青門繫紫騮

秣陵懷古

山色江聲共寂寥  
十三陵樹晚蕭蕭  
中原事業如江左  
芳草何須怨六朝

題虞美人蝴蝶畫扇

寫得春風分外嬌  
粉痕零落暈紅潮  
曲終夢醒渾無那  
同向斜陽恨寂寥

有感

帳中人去影澄澄  
重對年時芳苾鐙  
惆悵月斜香騎散  
人間何處覓韓馮

從見陽乞秋葵種

空庭脈脈夕陽斜  
濁酒盈樽對晚鴉  
添取一般秋意味  
牆陰不種斷腸花

四時無題詩十八首

一樹紅梅倚鏡臺  
含英次第曉風催  
深將錦幄重重護  
爲怕花殘却怕開

挑盡銀燈月滿階  
立春先繡踏青鞋  
夜深欲睡還無睡  
要聽檀郎讀紫釵

金鴨香輕護綺櫺  
春衫一色颺蜻蜓  
偶因失眠嬌無力  
斜倚熏籠看畫屏

手撚紅絲凭繡牀  
曲闌亭午柳花香  
十三時節春偏好  
不似而今惹恨長

青杏園林試越羅  
映妝殘月曉風和  
春山自愛天然妙

虛費隋宮十斛螺

綠槐陰轉小闌干八尺龍鬚玉簫寒自把紅牕開一扇  
放他明月枕邊看

水榭同攜喚莫愁一天涼雨晚來收戲將蓮葯拋池裏  
種出花枝是竝頭

小睡醒來近夕陽鉛華洗盡淡梳妝紗幮此日偏惆悵  
剪取巫雲做晚涼

追涼池上晚偏宜菱角雞頭散綠漪偏是玉人憐雪藕  
爲他心裏一絲絲

却對菱花淚暗流誰將風月印綢繆生來悔識相思字  
判與齊紈共早秋

解盡餘醒蕪盡香雨聲蟲語雨淒涼如何剛報新秋節  
便覺清宵分外長

璇璣好譜斷腸圖却爲思君碧作朱幾夜西風消瘦盡  
問儂還似舊時無

寒香細細撲重簾日壓雕簷起未吹端的爲花憔悴損  
一枝還向膽瓶添

凝陰容易近黃昏獸錦還餘昨夜溫最是惱人風弄雪

睡醒無事總關門

玉指吳鹽待剖橙  
忽聽樓外馬蹄聲  
問郎今日天寒甚  
却是何人抵暮行

是誰看月是誰愁  
夜冷無端上小樓  
已過日高還未起  
任教鸚鵡喚梳頭

漫學吹笙苦未調  
嬌癡且自倚庭蕉  
博山香盡殘灰冷  
零落霜花帶月飄

慢蒸甜香待煮茶  
桃符換却便聞鴉  
宿妝總待侵晨換  
留取鬢心柏子花

記征人語十三首

列幙平沙夜寂寥  
楚雲燕月兩迢迢  
征人自是無歸夢  
却枕兜鍪聽晚潮

橫江烽火未曾收  
何處危檣繫客舟  
一片潮聲飛石燕  
斜風細雨岳陽樓

樓船昨過洞庭湖  
蘆荻蕭蕭宿鴈呼  
一夜寒砧霜外急  
書來知有寄衣無

旌旗歷歷射波明  
洲渚宵來畫角聲  
啼遍鷓鴣春草綠  
一時南北望鄉情

青燐點點欲黃昏折鐵難消戰血痕犀甲玉桴今寂寞  
九歌原自近招魂

戰壘臨江少落花空城白日盡饑鴉最憐陌上青青草  
一種春風直到家

陣雲黯黯接江雲江上都無鴈鶩羣正是不堪回首夜  
誰吹玉笛弔湘君

邊月無端照別離故園何處寄相思西風不解征人苦  
一夕蕭蕭滿大旗

移軍日夜近南天薊北雲山益渺然不是啼烏銜紙過

那知寒食又今年

鬢影蕭蕭夜枕戈  
隔江清淚斷猿多  
霜寒畫角吹無力  
歸夢秦川奈爾何

一曲金笳客淚垂  
鐵衣閒却卧斜暉  
衡陽十月南來鴈  
不待征人盡北歸

纔歇征鼙夜泊舟  
荻花楓葉共颼颼  
醉中不解雙鞬卧  
夢過紅橋訪舊遊

去年親串此從軍  
揮手城南日未曛  
我亦無端雙袖溼  
西風原上看離羣

上元月食

夾道香塵擁狹斜  
金波無影暗千家  
嫦娥應是羞分鏡  
故倩輕雲掩素華

詠絮

落盡深紅綠葉稠  
旋看輕絮撲簾鉤  
憐他借得東風力  
飛去爲萍入御溝

偕梁汾過西郊別墅

遲日三眠伴夕陽  
一灣流水夢魂涼  
製成天海風濤曲  
彈向東風總斷腸

小艇壺觴晚更攜醉眠斜照柳梢西詩成欲問尋巢燕  
何處雕梁有舊泥

爲友人賦六首

不將才思唱臨春愛著荷衣狎隱淪分付芙蓉湖上月  
好留清影待歸人

夢裏誰曾與畫眉別來幾度燕相窺小樓日暮愁無那  
折取藤花寄所思

往事驚心玉鏡臺分香庭院長莓苔百花深護桃源犬  
不許人歌赤鳳來

長安北望杳茫茫  
泣向薰籠憶舊香  
惆悵玉環空寄與  
紫薇郎是薄情郎

珍重嬌鶯啄柳芽  
清狂曾賦壓牆花  
皚皚自喜人如雪  
何必丁甯繫臂紗

朝衣欲脫換輕衫  
無恙西風舊布帆  
秋入玉潭新月冷  
休因索莫怨崔咸

書鮑讓侯詩

多少才情艷綺霞  
羨君能賦上林花  
如余硯北渾無事  
閒倚紅牕枕木瓜

賦得柳毅傳書圖次陳其年韻

黃陵祠廟白蘋洲尺幅圖成萬古愁  
一自牧羊涇水上至今雲物不勝秋

花愁雨泣總無倫憔悴紅顏畫裏真  
試看劈天金鎖去雷霆原惱薄情人

晶簾碧砌玉玲瓏酒滴珍珠日未中  
忽報美人天上落寶箏筵裏盡春風

凝碧宮寒覆羽觴洞庭歌罷意茫茫  
玉顏寂寞今依舊雨鬢風鬟枉斷腸

柳枝詞十六首

一枝春色又藏鴉白石清溪望不賒自是多情便多絮  
隨風直到謝娘家

春到江南春草生乍驚搖曳撲簾旌黃鸝無語昏鴉起  
深閉重門待月明

七香車過殷輕雷十里紅樓照水開遙指玉鞭鞭白馬  
柳陰陰下是郎來

水亭無事對斜陽踈地輕陰却過牆休折長條惹輕絮  
春風何處不迴腸

何處纖腰不可憐  
纏頭拋與沈郎錢  
女兒睡覺推牕看  
忽憶迎歡舊繫船

永豐坊裏謝啼鵲  
移植紅泥曲檻邊  
涼月一簾思往事  
是他曾與伴無眠

人去樓空屬阿誰  
月明惟見影垂垂  
尋常已是堪愁絕  
何況春來贈別離

何事憑闌怨月明  
乍晴樓閣倚孤清  
相思一夕溪流漲  
倒影絲絲拂水平

綠到長干第幾橋  
晚晴簾幙隔吹簫  
前身定自輕狂甚

嫁得東風帶水飄

辛夷開罷絮紛紛青粉牆頭日未曛  
記得箇人春病起是他縈惹綠羅裙

手縮長條倚水樓困人風日懶梳頭  
濛濛一抹催花雨半繫斑騅半繫舟

軟風吹雪帶微香曾向珠樓掃鈿牀  
塘上鴛鴦三十六祇今何處月茫茫

風過遊絲卷落花又隨飛絮上簷牙  
東鄰爲約清明後陌上輕衫共採茶

一水縈迴鴈齒橋紅泥亭搭綠絲綠潯陽縱有麻姑信  
春雨春風自寂寥

細細萍吹水面風百花飛盡綠陰同別離管盡人如昨  
羅袖長垂玉筍紅

休栽楊柳只栽桐待鳳藏鴉好盡空不見胥臺明月夜  
一池黃葉但西風

上元竹枝

天上朱輪繡幃車幾看春色到梅花而今却畏春寒甚  
獨掩重門自試茶

題見陽小照

雨雪山空獨悟遲  
羨君瀟灑出塵姿  
靈和別殿臨風晚  
最憶春前第一枝

別蓀友口占

離亭人去落花空  
潦倒憐君類轉蓬  
便是重來尋舊處  
蕭蕭日暮白楊風

半山餘恨楚山孤  
今夜送君君去吳  
君去明年今夜月  
清光猶照故人無

題照

畫出東風別一般  
綠窗人靜獨憑闌  
就中真色圖難就  
最是春山兩筆難

塞垣却寄四首

絕塞山高次第登  
陰崖時見隔年冰  
誰憐妙寫簪花手  
却向雕鞍試臂鷹

千重煙水路茫茫  
不許征人不望鄉  
况是月明無睡夜  
儘將前事細思量

碎蟲零葉共秋聲  
訴出龍沙萬里情  
遙想碧窗紅燭畔  
玉纖時爲數歸程

枕函斜月不分明夢欲成時那得成一派西風連角起  
寒雞已到第三聲

別意六首

晶簾低映美人蕉雨歇芳叢點未消應是玉鞭歸較晚  
故來花底坐無聊

濃香如霧恍難尋執燭櫻桃伴夜深慚愧十郎歸未得  
空題紅淚寄焦琴

獨擁餘香冷不勝殘更數盡思騰騰今宵便有隨風夢  
知在紅樓第幾層

芭蕉影斷玉繩斜  
風送微涼透碧紗  
記得夜深人未寢  
枕邊狼藉一堆花

銀屏對影自生憐  
正是看花中酒天  
翦却合歡雙帶子  
一般牽恨又今年

茗盃香鑪事事幽  
每當相對便無愁  
金籠自結雙棲願  
那得題紉怨早秋

暮春見紅梅作簡梁汾

杏花庭院月如弓  
又見江梅一瓣紅  
知是東皇深著意  
教他終始領春風

乙丑

初夏月偕仲弟作

雲母窗扉夜不扃  
露華和月滿中庭  
可憐春去無多日  
已怯微暄做畫屏

龍泉寺書扇

雨歇香臺散晚霞  
玉輪輕碾一泓沙  
來春合向龍泉寺  
方便風前檢較花

繡旛風定畫情悵  
證取蓮花不染心  
佛法自來空色相  
當年何事苦吞鍼

飲水詩集

譚瑩玉生覆校

